

ՎԱՅԵ ԱՎԵՏԻՍՅԱՆ
VAHE AVETISYAN

ԱՆՏԻՈՔԻ ԴԵՍՈՒԹՅԱՆ ԵՎ ԿԻԼԻԿՅԱՆ
ԹԱԳԱՎՈՐՈՒԹՅԱՆ ՓՈԽՅԱՐԱՔԵՐՈՒԹՅՈՒՆՆԵՐԻ
ԲՆՈՒՅԹԸ XIII-XIV. 50-60-ԱԿԱՆ ԹԹ.

Անտիոքի դքսության պատմության մեջ Բոհեմունդ V-ի իշխանության շրջանը (1233-1251թթ.) ավելի շատ հայտնի է որպես կարևոր իրադարձություններով աչքի չնկնող, Անտիոքի մեկուսացման և լծացման ժամանակաշրջան: Դրան նպաստել են և աղբյուրներում համեմատաբար քիչ տեղեկությունները նրա Անտիոքյան գործունեության մասին, և այն, որ Բոհեմունդը լինելով նաև Տրիպոլիի կոմս՝ իր հիմնական նստավայր ընտրել էր հենց Տրիպոլի: Անտիոքի հյուսիս-արևմտյան հարևան Կիլիկյան թագավորության հետ փոխհարաբերությունները նրա օրոք զարգանում էին ավանդական հակամարտության համատեքստում, բայց դքսի կառավարման վերջում երկու հարևան քրիստոնեական պետությունների միջև երկարատև թշնամությունն ավարտվեց հաշտությամբ, որի նախաձեռնողը հանդիսացավ խաչակրաց արշավանքի ելած Ֆրանսիայի թագավոր Լյուդովիկոս IX-ը (1226-1270թթ.): Նա 1248թ. աշնանը և 1249թ. ձմռանը Կիպրոսում եղած ժամանակ ի քիվս Մերձավոր Արևելքի բոլոր քրիստոնեական շրջանների մերձեցման ուղղությամբ արված քայլերի, Նիկոսիայում ընդունեց նաև Անտիոքի դքսի և Հայոց թագավոր Հեթում I-ի (1226-1269թթ.) պատվիրակներին, որոնք եկել էին ողջունելու Լյուդովիկոսի գալուստը և հայտնելու Սուրբ պատերազմին մասնակցելու իրենց պատրաստակամությունը: Լյուդովիկոսը նրանց հորդորեց վերջ տալ նախկին հակամարտությանը, մշտապես լինել միասին և զենքը ձեռքին պայքարել ընդհանուր թշնամու դեմ և որպես այդ միասնության խորհրդանիշ նա զորաջոկատներ ուղարկեց Անտիոք ու Կիլիկիա¹:

Վերջիններիս փոխհարաբերությունները որակական նոր փոփոխություններ կրեցին հատկապես Բոհեմունդ V-ի հաջորդ Բոհեմունդ VI-ի (1251-1268թթ.) օրոք: Գահակալման պահին լինելով ընդհամենը 14 տարեկան՝ նրան ոչ միայն

¹ Jauna D., Histoire générale des royaumes de Chypre, de Jérusalem, d'Arménie et d'Égypte, Leyde, 1741, p. 592. և Жан де Жуанвиль, Жизнь Людовика Святого, М., 2008, с. 196.

հաջողվեց ազատվել մոր՝ Լյուսիեն դե Կոստրի խնամակալությունից, այլ օգտագործելով նրա մշտապես Տրիպոլիում գտնվելու հանգամանքը, կարողացավ նաև Յաֆֆայում գտնվող Լյուդովիկոս IX-ի աջակցությամբ Անտիոքի կարիքների պատրվակով մորից միջոցներ կորզել։ Զնարավոր է, որ հայերն այդ հարցում օժանդակել են երիտասարդ իշխանին՝ ձգտելով ազատվել Անտիոքի իրենց համար անցանկալի տարրերից, հատկապես հունական համայնքի ակտիվացումից, որոնց նույնիսկ հաջողվել էր վերականգնել պատրիարք Եվթիմիոսի աթոռը²։ Համենայն դեպս, հայերն ուղեկցում էին Բոհեմունդին Յաֆֆայում եղած ժամանակ³։ Իսկ այն, որ դքսին մտահոգում էր ոչ թե Անտիոքի ճակատագիրն, այլ մոր խնամակալությունից ազատվելը և ֆրանկ տարրի ամրապնդումը, ապացուցում է այն, որ արդեն 1253թ. վերջին և 1254թ. սկզբին նա Տրիպոլիում էր ու շքեղ ընդունելություն էր կազմակերպել Լյուդովիկոսի պատվիրակների համար⁴։

Անտիոքի և Կիլիկիայի ռազմաքաղաքական դաշինքն ամրապնդվեց 1254թ., երբ Բոհեմունդ VI-ն ամուսնացավ Զեթուն I-ի դուստր Սիբիլի հետ⁵։ Շատ հետազոտողներ նշում են, որ այդ ամուսնությունից հետո Բոհեմունդը որոշ առումով դարձել է Զեթունի վասալը, որ հայերը համաձայնել են կիսել Անտիոքի պաշտպանության պատասխանատվությունը, որ այդուհետ դքսությունն ամբողջությամբ գործել է Կիլիկյան Հայաստանի քաղաքական համակարգում։ Որպես ասվածի արտացոլում նշվում են Բոհեմունդի և Զիվանդախնան միաբանների, նրա դեմ Տրիպոլիում ծագած ապստամբների միջև հաշտեցման գործում Զեթունի միջնորդությունը 1259թ., և մասնավորապես, մոնղոլների հետ դաշինքի մեջ ներքաշման փաստերը⁶։

Սակայն համադրելով աղբյուրների տեղեկություններն, ավելի շատ հիմք ենք ստանում խոսելու խնամական կապերով և փոխադարձ այցելություններով ամրապնդված ֆրանկո-հայկական կայուն դաշինքի, քան փաստացի վասալության մասին։ Նախ, ասպետական միաբանությունների, իտալացի վաճառականների, բյուզանդացիների և խաչակիր իշխանների միջև հաշտեցման պրոցեսը սկսել էր Լյուդովիկոսը IX-ը, որին Արևելքում ընդունում էին

² Runciman S., A history of the Crusades, v. III, London, 1954, p. 231-233.

³ Жан де Жуанвиль, Жизнь Людовика Святого, с. 289-290.

⁴ Жан де Жуанвиль, Жизнь Людовика Святого, с. 309.

⁵ Смбаг Спаракет, Летопис, пер. Галстян А., Е., 1974, с. 130-131.

⁶ Մասնավորապես Runciman S., A history of the Crusades, v. III, p. 287, Տրիպոլիոյան Լ., Խաչակիրները և հայերը, Հ-Ա, Ե., 2005, էջ 70-71, Rene Grousset, Histoire des croisades et du royaume Franc de Jerusalem, v. III, P., 1936, p. 515-516.

որպես “համերաշխության հրեշտակ”⁷: Նրա գործուն կողմնակիցն էր նաև Զիվանդախնամների մագիստրոս Կիլյամ Շատոնովացին, որը դեռևս 1256թ. Բոհեմունդի հետ եկել էր նախնական համաձայնության: 1259թ. պայմանագիրը կնքվեց Երուսաղեմի գահաժառանգության համար ծավալված քաղաքացիական պատերազմին վերջ տալու անհրաժեշտության նպատակով ընդհանուր համաձայնության գալու ֆոնի վրա, որին նախորդել էր 1258թ. հոկտեմբերի պայմանագիրն ասպետական միաբանությունների միջև՝ Քրիստոնեական Արևելքում իրենց ազդեցության շրջանների հարցի շուրջ: Ուստի Զեթումի դերն այդ գործում մեղմ ասած չափազանցված է: Իսկ 1259թ.-ին Տրիպոլիում Բոհեմունդի դեմ ծագած ապստամբությունը ճնշելու գործում Զեթումի ցույց տված օգնությունը⁸ դժվար թե դիտվի որպես “սյուզերենի” պարտավորությունների կատարում, քանի որ նման միջնորդությունը բնավ առաջինը չէր Կիլիկիայի և Անտիոքի պատմության մեջ: Առավել ևս, որ այն ծագել էր Բոհեմունդի մի շատ հավակնոտ ծրագրի արդյունքում, որն արմատապես հերքում է նրա Մերծավոր Արևելքի որևէ իշխանից կախումը և ընդհակառակը, հաստատում տարածաշրջանում առաջնության հասնելու նրա ցանկությունը: Դա բխում է նրանից, որ Բոհեմունդը 1258թ. փետրվարից պայքարում էր Երուսաղեմի և Կիպրոսի թագավորությունների խնամակալ հռչակվելու համար, որի նպատակով Ակրայում գտնվող իր կողմնակիցներին նա տրամադրում էր գումար և զինվորական ուժ⁹: Ինչպես տեսնում ենք և Լյուդովիկոսի, և Զեթումի օգնությունը ոչ թե Բոհեմունդին փրկելու, այլև վերջինիս կողմից իր իշխանատենչական նկրտումներն իրագործելու նպատակ էր հետապնդում:

Գրեթե մույն տեսանկյունից էր Անտիոքի դուքսը մայում նաև Ասորիքում հայտնված մոնղոլներին, որոնց հետ դաշինքի կազմումն ավանդաբար համարվում է Բոհեմունդի վրա Զեթումի ազդեցության հիմնական արտահայտություն: Դեռևս 1246թ.-ից Զեթումը կապեր էր հաստատել մոնղոլների հետ և ճանաչել նրանց գերիշխանությունը, բայց դրանից նա մեծ հաշվով միայն շահել էր՝ ունենալով հզոր դաշնակից մահմեդական հարևանների դեմ: Նա փորձում է այդ հակամահմեդական միության մեջ ներքաշել նաև տարածաշրջանի մյուս քրիստոնեա առաջնորդներին, բայց միայն Անտիոքի դուքսն է գնում այդ քայլին¹⁰ և 1260թ. Զեթումի հետ ներկայանում Անտիոքի սահման-

⁷ Жозеф Мипо, История крестовых походов, СПб.-М., 1884, с. 254-255.

⁸ Смбат Спарамет, Летопис, с. 131.

⁹ L'Estoire de Eracles Emperéur, Recueil des Histories Croisades (RHC), Histoire Occidentaux. T. II, p., 1859, p. 443.

¹⁰ Ришар Ж., Латинно-Иерусалимское королевство, СПб, 2002, с. 349.

ներին հասած Յուլավուի ճամբար: "Գործք Կիպրացոյցն" այս առնչությամբ նշում է. "Չքնաղ իշխան Բոհեմունդը մեծ ընդունելության արժանացավ հզոր արքա Յուլավուի կողմից, քանի որ իշխանը հայոց արքայի փեսան էր...: Նրանք պետք է միանային թաթարներին և առաջանային Դամասկոս, որը սարացիների ձեռքում էր"¹¹: Այս տեղեկությունը հանդիսանում է այն առաջնքը, որի հիման վրա Բոհեմունդի ներքաշումը հակամամուլության կռաւիցիայի մեջ դիտվում է որպես Անտիոքի վրա Կիլիկիայի քաղաքական ազդեցության հետևանք: Բայց սա ավելի շատ ընդգծում է Յթումի լավ փոխհարաբերությունները Յուլավուի հետ, քան Բոհեմունդի կախվածությունը նրանից: Բացի դա, Բոհեմունդը դաշինքի դիմաց մոնղոլներից այնպիսի առաջարկներ ստացավ, որ դժվար է պատկերացնել, թե նրա փոխարեն որևէ մեկը կարող էր դրանցից հրաժարվել: Այսպես, Յուլավուն նրան խոստացավ հաջողության դեպքում Անտիոքին վերադարձնել անդրորոնտյան բոլոր տարածքները, որոնք մահմեդականների ձեռքում էին¹²: Նման նվաճումներից Բոհեմունդին չէին կարող ետ պահել նույնիսկ Յոռմի պապի կողմից "անհավատների" հետ դաշինքի պատճառով բանադրանքի ենթարկվելու հեռանկարը¹³: Ասվածից հետևում է, որ Բոհեմունդն ամբողջությամբ գործում էր իր հայեցողությամբ՝ ելնելով ստեղծված իրավիճակից, իսկ Յթումը լավագույն դեպքում կարող էր նրան համոզել ընդհանեն այդ քայլին զնալու նպատակահարմարությունը, բայց ոչ ավելին:

Ստեղծված եռակողմ դաշինքը պահպանվեց մինչև Անտիոքի դքսության կործանումը՝ 1268թ. և ունեցավ բազմաթիվ փոխօգնությունների օրինակներ¹⁴: Մեծ հաշվով դրանք ավարտվել էին 1266թ.-ին, երբ մամլուքները Սարի ճակատամարտում հայերին ծանր պարտության մատնեցին, ապա շատ չանցած հեշտությամբ գրավեցին Անտիոքը:

¹¹ Les Gestes des Chiprois, RHC, Doc. arméniens, T. II, P., 1906, p. 751.

¹² Պետք է ասել որ նրանք կատարեցին իրենց խոստումը և համատեղ ուժերով Յալեայի ու Դամասկոսի առումից հետո Անտիոքը հետ ստացավ այդ հողերը՝ մասնավորապես Լաթաքիա նավահանգիստը: Տես, Runciman S., A history of the Crusades, v. III, p. 306.

¹³ Կողովված այդ "ամոթալի հպատակությունից", Բեթլեհեմի եպիսկոպոսը բանադրանքի ենթարկեց նրան, հատկապես վիրավորված նրանից, որ Բոհեմունդը Յուլավուի պահանջով Անտիոքում վերականգնել էր հույն պատրիարք Եվթիմիդոսին: Իր հերթին Բոհեմունդը դիմեց պապին և վերջինս, այն բանից հետո, երբ նա Յթումի օգնությամբ կարողացավ ուժով Եվթիմիդոսին տանել Կիլիկիա և վերականգնել լատին պատրիարքին, 1263թ. մայիսի 26-ին չեղյալ հայտարարեց բանադրանքը: Տես, Рипар Ж., Латинско-Иерусалимское королевство, с. 350-351.

¹⁴ Մամրամասներ տես René Grousset, Histoire des croisades et du royaume Franc de Jérusalem, v. III 611, նաև Микаэлян М., История Киликийского Армянского царство, Е., 1952, с. 333-334, 344.

Այսպիսով, խոսելով Ամտիոքի դքսության և Կիլիկիան թագավորության փոխհարաբերությունների բնույթի մասին, մենք որևէ լուրջ հիմք չունենք պնդելու, որ Բոհենմունդն ինչ-որ ձևով վասալական կախում ուներ Դեթումից։ Մենք կարող ենք խոսել սերտ դաշինքի կամ մույնիսկ միասնական պետության գնացող փոխհարաբերությունների մասին միայն։ Այս վերջին ձգտումը պարզ նկատելի է Սմբատ Սպարապետի կողմից «Ամտիոքի Ասիզների» հայերեն թարգմանության և Կիլիկիայում գործածության մեջ դնելու ցանկության մեջ։ Նա թարգմանությունը սկսել է Մարի ճակատամարտից հետո, որն ըստ Միքայելյանի կարող է կապված լինել ֆեոդալների զինվորական պարտավորությունները խստացնելու հետ¹⁵։ Սակայն, եթե դա պետք է ծառայեր զուտ Կիլիկիայի ներքին խնդիրներին, ապա ինչու՞ էր Սմբատը թարգմանությունից հետո Ասիզների բնագիրը և հայերեն թարգմանությունը մեծ ջանքերի զնով ուղղարկում Ամտիոքի «դատարան», որպեսզի այնտեղ համեմատեն և ստորագրություններով հաստատեն, որ դրանք բառ առ բառ համընկնում են իրար, ինչպես նշում է ինքը՝ Սմբատ Սպարապետը¹⁶։ Այս հանգամանքը ստիպում է կարծել, որ և Կիլիկյան, և անտիոքյան արքունիքներում հասունացել էր հավասար իրավունքներով միասնական ճակատ կազմելու ձգտումը, որին մասնավորապես նպաստեցին Լյուդովիկոսի գործունեությունն ու նրա անհաջող խաչակրաց արշավանքը, լատին պետությունների ճակատագրի նկատմամբ Արևմուտքում աճող անտարբերությունը և մասնավորապես հարևան մահմեդականների հաղթանակները։ Այնպիսի հեռատես քաղաքական գործիչների համար ինչպիսիք էին Դեթումն ու Բոհենմունդը, դժվար չէր հասկանալ, որ ստեղծված իրավիճակում քրիստոնեական տարրը տարածաշրջանում միայն միասնաբար կարելի է փրկել, սակայն այդ վերջին ճիգերն արդեն անգործ էին դա անելու։

¹⁵ Мисаелян М., История Киликийского Армянского царство с. 284.

¹⁶ Ассизы Антиохийские, пер. Паповяна А., «Բանբեր Սատեմադարանի», N 4, Ե., 1958, էջ 335.